



Minggu, 06 Maret 2022

Ogen: Esekiel 31:1-18



Kayu Si Meganjang Mbulak Me



Seh jilena sada batang kayu si igambarken bas ogenta wari enda (ayat 1-9). Batang kayu si galang, dahan-dahanna mejile dingnen marabun. Perbahan ganjangna pucukna seh ku embun. Taneh inganna turah erlau emaka mejile perturahna. Perik-perih melala rasar bas dahanna, rubia-rubia kerangen nubis i teruh batangna, janah kerina bangsa-bangsa cilinggem bas endemna. Tuhu-tuhu kayu e seh kal jilena dingnen paguhna, iakui pe maka la lit kayu si terpeseri ras kayu e. Adi si genduari ngatakan maka kerina mata natap kempak ia.

Kayu enda iandingken man bangsa Mesir. Bangsa si termur-mur, mehaga, paguh. Kinijilenna erbahanca melala bangsa sideban merincuh erteman ras ia dingnen mindo kerjasama. Kerina kalak ter-Mesir, Mesir erkiteken kinijilen ras kepaguhenna. Tapi kai si jadi? Reh ganjangna kayu e reh ganjangna ka ukurna, melala jadi kejahatan i je. Lanai igejapkenna maka Dibata kap erbahanca ia mejile. Perbahanenna e erbahanca turah rawa Dibata, e maka ipake me sada bangsa guna nabah kayu e jenari itadingken. Dahanna jadi kerah dingnen bengket ku bas doni kematen. Kerina bangsa-bangsa si sedekah enda reh dingnen ringan cilinggem i teruhna lawes me dingnen i sekelewetna jadi melus me.

Enda me gambaren nandangi raja Mesir ras kerina rakyatna. Erkiteken kiniganjangen rukur; bas kinijilenna e iakapna ulih perbahanenna. Lanai ingetna Dibata maka man kalak si la patuh iukum me nusur ku doni kematen.

Turi-turin enda njemba kita segelah tetap nginget maka kerina sialoken kita bas paksa kesuksesen erkiteken perkuah ate Dibata. Perkuah ate Dibata si mbelin e me mabai kita segelah tetap ngeluh patuh, dingnen ernanam man jelma sienterem. Bahanlah kai senggo ialoken e jadi kemuliaan man Dibata sabap e rehna i bas IA nari. Tentuna si e mabai kita ngasup tep-tep wari ngeluh bas kiniteruken ukur dingnen dem bas pengatakan bujur i bas kerina dampar kegeluhen.